

Poštovani, podnosim inicijativu u skladu sa članom 106. Poslovnika Skupštine Kantona Sarajevo koja se odnosi na:

Vlada Kantona Sarajevo

## INICIJATIVA

### Regulisanje prevoza učenika na području Općine Hadžići

#### OBRAZLOŽENJE

Na području općine Hadžići egzistira pet škola, četiri osnovne i Srednjoškolski centar. Obzirom na veliki broj učenika koji dolaze iz udaljenih mjesta Općine Hadžići, te su prinuđeni da korise javni prevoz kako bi došli do svojih škola.

Učenici OŠ „Hadžići“ koji vozare iz naselja Binježevo i Miševići trenutno koriste autobus koji vozi liniju Ilidža-Vukovići. Linija je neredovna a zbog velikog broja putnika koji koriste ovu liniju, često se dešava da, kada autobus dođe, uopšte ne stane na stanicama jer je prethodno popunjen kompletan kapacitet. Linije često kasne ili ih nema nikako, što uzrokuje da učenici čekaju na stanici satima, a zbog čega se ugrožava zdravlje učenika kao i nastavni proces koji trpi. Nastavnici su primorani da učenike ovih razreda 20 minuta prije kraja časa puste sa nastave kako bi se uklopili u raspored vožnje jer sljedeći autobus dolazi tek za sat vremena i više.

Također, koristeći ovu liniju učenici izlaze na centralnoj stanici u Hadžićima, a koja je udaljena od škole pa učenici moraju preći čitave Hadžiće da bi stigli do škole.

Potrebno je uvesti posebnu liniju Miševići - Binježevo te napraviti liniju kretanja kao bi učenici izlazili kod same škole.

OŠ „6. mart“ ima probleme sa prevozom učenika iz naselja Kasatići, Drozgometva i Košćan.

Linija Kasatići uopće ne saobraća iako je ovo naselje od same škole udaljeno nekoliko kilometara, dok linija prema Drozgometvi je neredovna sa stalnim skraćivanjem prema Košćanu.

OŠ „9. maj“ ima problem sa prijevozom iz naselja Resnik i Osenik. Linije se propuštaju, a i kada saobraćaju minibus ne ide u naselje Osenik. Na početku je bio izgovor neuslovan put, ali je već odavno put asfaltiran, međutim i dalje problem ostaje isti.

OŠ „Hilmi ef. Šarić“ ima problem sa linijama Tarčin - Budmolići i linijom Ilidža-Vukovići.

Liniju prema Budmolićima koristi više od 150 učenika, linija je neredovna i nepouzdana zbog trošnih autobusa koji su više vremena u kvaru nego što voze. Linija Ilidža -Vukovići je opisana u problemima prevoza iz naselja Binježevo.

U svim školama zabilježen je veliki broj izostanaka sa nastave zbog prevoza.

Roditelji su svaki dan prinuđeni provjeravati da li će uopće autobusa biti, tema svakog vijeća roditelja je problemi sa prevozom.

Nedavno je, nažalost, jedna učenica Srednjoškolskog centra teže povrijeđena nakon što je udario kamion, a zbog kašnjenja autobusa i žurbe da ne zakasni na nastavu.

Svjesni smo da problemi sa javnim gradskim prevozom traju godinama i da nema brzog i laskog rješenja ali naglašavamo da je stanje sa javnim gradskim prevozom na području Općine Hadžići alarmantno!

Molimo da se što hitnije uključite u rješavanje ovog problema te od Vlade KS i nadležnog Ministarstva tražimo nabavku najmanje dva minibusu i jednog autobusa za liniju Budmoliće, te povećanje broja linija Ilidža - Vukovići.

Sarajevo, 14.12.2021. godine

Predsjedavajući Skupštine Kantona Sarajevo  
Elvedin Okerić